

Crair tut u nagut che stat scrit en la bibla

En l'America datti blers che crain al stgaffiment, en Svizra exista era ina grupp

DA CLAUDIA CADRUVI / ANR

■ **Gian Luca Carigiet è il tip d'in manager modern. Da l'autra vart crai el mintga pled che stat scrit en la bibla. El ha gronds plans: bajegiar in parc da divertiment cun il num «Genesis-Land».** Il carstgaun e las schimngias han ils medems antenats. Questa teoria ha Charles Darwin formulà en il 19avel tschientaner. Oz, en il 21avel tschientaner, crai quasi mintgin en l'Europa che questa teoria constat. Ma i dat anc adina glieud che crai al «stgaffiment dal mund» (Schöpfungstheorie) uschia sco el è descrit en la bibla. I na sa tracta betg sulet da vegls cristifidaivels fanatici. *Gian Luca Carigiet* è in dad els. El ha fundà Pro Genesis. «Nus lain mussar che la ducrina dal stgaffiment constat», di el.

Betg per cor la Baselia catolica

Gian Luca Carigiet è naschì il 1957. El è creschì si a Domat en ina famiglia rumantscha ensem cun tschintg fragliuns. Carigiet ha fatg il diplom federal da contabilist e lavura dapi 25 onns sco econom da manaschi. Ses temp liber deditgescha el a las teorias dal stgaffiment dal mund.

«Jau er in uffant fitg cartent», di Carigiet. «La Baselia catolica n'avev jau betg gist per cor. Quai n'è era oz betg auter. Ma jau carteva che tut ils carstgauns vegnian enta parvis.» Fin en scola secundara: Là ha Carigiet gi in scolast che ha ditg che quai cun Adam ed Eva na constettia betg. «Mes bel mund è crudà en semen.»

«Darwin n'ha betg raschun»

«Jau hai suenter era cartì la teoria d'evoluziun da Darwin», di Carigiet. «Ma jau



Gian Luca Carigiet vul bajegiar in parc biblic per 50 fin 60 milliuns francs.

FOTO C. CADRUVI

hai cartì sulet cun il chau, betg cun il cor.»

Cun trenta onns haja el cumenzà a sa fatschentar da radent cun dumondas sco: «Danunder vegnin nus? Pertge essan nus qua? Nua giain nus?» El haja tschertgà en la filosofia, en l'esoterica, tar il hinduism ed il budissem. A la fin haja el constatà ch'i na dettia nagins mussaments per la teoria da Darwin. I saja be ina ipotesi cun intgins indizis. E lezs possian ins interpretar sin differents modas.

Ils Americans èn pli religios

En ses cudesch «Von Ewigkeit zu Ewigkeit» ha Carigiet scrit si sias enconuschientschas. E lezzas dian ch'il mund è vegnì stgaffì da Dieu. «Jau na sun betg religios», di Carigiet. «Ma jau schess ch'jau saja in criticher da la teoria d'evoluziun.»

Per quest motiv ha Carigiet fundà l'uniun Pro Genesis. L'uniun dumbria

radund 150 commembers e 600 interessents. «Nus essan diesch persunas che lavurain durant il temp liber per l'uniun. Da quels diesch han bunamain tuts fatg ina scol'auto. Nus avain in advocat, in medi, in teolog e students.»

«Bliers vulan metter nus a pèr cun ils creationists en l'America», di Carigiet. «Ma nus n'avain nagins contacts.» Ils creationists americans sajan blers pli cartents e religios. Pro Genesis na veglia betg esser ina Baselia che cumondia a ses commembers co ch'els stoppian viver.

Bibla e divertiment per famiglias

Da preschent ha Pro Genesis gronds plans. L'emna proxima, ils 22 da zercladur, preschenta l'uniun en il hotel Krone a Turitg il project «Genesis-Land». «I

duai esser ina maschaida tranter in mysterie-parc dad *Erich von Däniken* e l'Europapark», declera Carigiet.

Amez il parc stat l'arca da Noah da radund 140 meters lunghezza. Ordenturn hai bajetgs. Il parc preschenta la stgaffiziun dal mund ch'è succedida entaifer 6000 fin 10 000 onns, uschia il prospect davart il project. Famiglias cun uffants pon s'infurmar, sa divertir e sa laschar impressiunar. La differenza tar il mysterie-parc: «En il mysterie-parc ves'ins ina massa e sorta cun tschient dumondas. Ma en il 'Genesis-Land' van ins cun tschient dumondas e turna anora cun ina solia risposta.»


L'immaculada conceziun?

Ils custs per il parc calculescha Carigiet cun 50 milliuns francs. Ins dovria sa cha-

pescha in bun lieu, di Carigiet, p. ex. la regiun enturn il Lai da Constanza.

Sulet cun donaziuns na vegnian ins betg da realisar il project, conceda Carigiet sco um da fatschenta. I dovria buns investurs. Ma l'emprim vul Pro Genesis rimnar 50 000 fin 100 000 francs per far ina studia preliminar. La studia duai mussar si la realisabladad da «Genesis-Land». E tge di il prospect? «Ma la fin finala decida Dieu sez surlunder, sche quest project vegn realisà u betg.»

E per finir anc in'ultima dumonda pertutgant la bibla: Cartais Vus atgnamain era a l'immaculada conceziun da Maria? Carigiet targlina in mumentin, ma lura di el en tun datschert, sco sch'el stuess persvader sasez: «Jau sun consequent. U ch'jau crai tut che stat scrit en la bibla, u nagut.»



Ina visiun dal parc, co el duai vesair or.

MAD